



Služba za saobraćaj, stambeno-komunalne poslove i građenje

OPĆINSKO VIJEĆE ILIJAŠ

**Odgovori na vijećnička pitanja i inicijative sa 7. sjednice Općinskog vijeća Ilijaš
održane dana 24.06.2021.godine**

Ilijaš: Avgust 2021.godine

VERNESA BEŠLIJA - vijećnica NIP

Inicijativa: "Podnosim inicijativu za izgradnju trotoara u MZ Luka, tačnije na lokaciji preko puta firme "Sacom" d.o.o. Obrazloženje: Trotoar je izgrađen kompletnom dužinom, međutim, na navednoj lokaciji preko puta firme "Sacom" d.o.o. nedostaje nekoliko metara trotoara zbog privatnog posjeda, te su građani prinuđeni da se na tom dijelu kreću cestom, a znamo da je to područje industrijske zone koje je veoma prometno i ima mnogo nesavjesnih vozača koji ne poštuju ograničenja, što predstavlja dodatnu opasnost za pješake. Kako navode građani iz MZ Luka, vlasnik nekretnine gdje dolazi do prekida nikada nije sporio izgradnju trotoara na tom dijelu, te podnosim inicijativu da se riješe imovinsko-pravni odnosi i izgradi dio trotoara koji nedostaje".

Odgovor: U narednom periodu pokrenut ćemo postupak realizacije ove inicijative.

MEHO HIDO - vijećnik NIP

Inicijativa: "Pokrećem inicijativu za sanaciju makadamskog puta u naselju Medojevići (MZ Srednje), zvanog "Put spasa" koji povezuje naselja Medojevići preko Jelice, uključujući i Stanove, do Velikih Šuma, u dužini oko 2,5 km. Put je trenutno u nezadovoljavajućem stanju, mnogo je eksploatisan i iziskuje određene zahvate. O važnosti ovog puta suviše je i pričati, uzimajući u obzir ratni period tokom kojeg je ovaj put bio od presudnog značaja. Sada ima ulogu protupožarnog puta između dvije mjesne zajednice (Srednje i Gajevi), a osim toga, koristio bi i lokalnom stanovništvu, te omogućio povratak desetak porodica na svoja ognjišta".

Odgovor: Ovaj putni pravac spada u kategoriju šumskih puteva. Prije nekoliko godina na sastanku u kabinetu Načelnika općine Ilijaš predstavnici KJP "Sarajevo šume" dali su obećanje da će sanirati taj put. Nažalost do realizacije nije došlo. Služba će ponovo kontaktirati KJP "Sarajevo šume" i vidjeti dokle se stiglo sa realizacijom istog. Ako ne bude nikakvih pomaka ovaj putni pravac će se kandidovati za Operativni plan 2022. godine i ako bude u prioritetu bit će i realizovana inicijativa.

ALEMA DŽAFO - vijećnica NIP

Pitanje: "Koliko rasvjetnih tijela je u ovoj godini postavljeno i na kojim tačno lokacijama?

Obrazloženje: Postavljam pitanje prema nadležnoj službi koliko rasvjetnih tijela je postavljeno u ovoj godini i na kojim tačno lokacijama, s obzirom da je odgovor na brojne inicijative ovog tipa da je planirano postavljanje 100 rasvjetnih tijela u ovoj godini".

Odgovor: U ovoj godini tj. do kraja jula mjeseca nije postavljeno ni jedno rasvjetno tijelo na području Općine Ilijaš. Nakon isteka ugovora u 2020 godini na izgradnji, rekonstrukciji i proširenju javne rasvjete po Mjesnim zajednicama, a nakon usvajanja Budžeta pripremljena je tenderska dokumentacija za javnu rasvjetu za period 2021/2022 godinu koja se treba raspisati u ovom mjesecu.

Inicijativa: "Pokrećem inicijativu za rješavanje rasvjete u MZ Luka, od firme Ilmex do skretanja za tunel. Obrazloženje: Iako postoje rasvjetna tijela u navedenom području, većina njih nije u funkciji, te pokrećem inicijativu za rješavanje ovog problema.

Odgovor: Dat je nalog KJKP "PARK" d.o.o. Sarajevo koja je ugovorena firma na održavanju javne rasvjete na Kantonu Sarajevo koja radi na rješavanju kvara na pomenutoj lokaciji.

Inicijativa: "Pokrećem inicijativu za sanaciju potoka u ulici Polomska, MZ Podlugovi, koji se nalazi odmah uz put i koji stvara probleme mještanima, s obzirom da navedeni put građani sami od svojih sredstava saniraju, ali spomenuti potok uništi njihova ulaganja. Obrazloženje: U navedenoj ulici uz put koji mještani tog područja samostalno saniraju i finansiraju, neophodno je sanirati potok koji usljed oborina naraste i uništi sve uloženo. Također, građani smatraju da je neko samostalno uključio kanalizaciju u navedeni potok, te se zbog toga redovno širi izuzetno neugodan miris. Ovim putem tražim od nadležne službe da izađe na lice mjesta i nađe najadekvatniji način za dugoročno rješavanje ovog problema.

Odgovor: Izvršen je terenski obilazak i konstatovano da potok protiče kroz privatne parcele i da je većina parcela zasijana povrćem.

Inicijativa: "Pokrećem inicijativu za postavljanje pet rasvjetnih tijela u ulici Polomska, Podlugovi, ispod Apartmanskog naselja Sovrle. Obrazloženje: Navedeni prostog nije

osvjetljen, a u ovo području se nalazi deset kuća sa desetero djece".

Odgovor: Raspored rasvjetnih tijela javne rasvjete radi i određuje lokacije savjet mjesnih zajednica tog područja a prema odobrenom broju i rasporedu broja rasvjetnih tijela po MZ. Predmetna lokacija u 2021 godini nije obuhvaćena izgradnjom nove javne rasvjete.

ALEN HASKOVIĆ - vijećnik SDA

Inicijativa: "Iniciram prijedlog Sedmoj policijskoj upravi Sarajevo, odnosno Policijskoj stanici Ilijaš da, u okviru utvrđenih nadležnosti, poduzme aktivnosti sprječavanja vožnje biciklima u predjelu pješačke zone, tzv. šetališta u Ilijašu. Obrazloženje: Veliki broj građana Ilijaša u večernjim terminima, sa svojim porodicama, sa djecom, provodi vrijeme na ovom, propisno obilježenom lokalitetu. Istovremeno, prisutan je i nemali broj onih, koji ne poštuju označene zabrane i, u predjelu pješačke zone, voze bicikle, te tim aktivnostima ozbiljno ugrožavaju bezbjednost, prije svega, najmlađih sugrađana".

Odgovor: Inicijativa je dostavljena Policijskoj stanici Ilijaš i u prilogu dostavljamo Informaciju (akt broj: 02/14-1-19-854/21).

ALMIR ŠPIODIĆ - vijećnik NIP

Pitanje 1: "U kojoj fazi je realizacija projekta rekonstrukcije puta preko Vratuše za Mrakovo? U Operativnom planu za 2021. godinu planirana je prva faza rekonstrukcije što podrazumijeva rješavanje oborinskih voda i podzemnih instalacija. Kada možemo očekivati početak radova?"

Odgovor: Rekonstrukcija puta preko Vratuše Operativnim planom za 2021. godinu je planirana da se realizira iz programa održavanja, rekonstrukcije i izgradnje saobraćajnica koje implementira Direkcija za puteve Kantona Sarajevo. Zbog nedostatka sredstava u dogovoru sa resornim ministrom i direktorom Direkcije za puteve implementacija ovog projekta planirana je u 2022. godini.

Pitanje 2: "Da li na trasi puta preko Vratuše od ulice Polomska prema Mrakovu postoji neka imovinsko-pravna prepreka, te se zbog toga ne vrši rekonstrukcija puta? Ako postoji, molim da mi se obrazloži šta je u pitanju i da li postoji način da se ista prevaziđe?"

Odgovor: Projekat saobraćajnice je urađen na osnovu RP-a i podrazumijeva eksproprijaciju zemljišta. Na terenu prilikom implementacije projekta došlo je do problema, ali se nadamo da ćemo u saradnji sa MZ riješiti iste.

Pitanje 3: "Šta je projektom planirano uraditi na rekonstrukciji puta preko Vratuše za Mrakovo u smislu: koja širina puta, koliko kolovoznih traka i koliko je širina trotoara, na koji način riješiti oborinske vode itd.? Rekonstrukciju ovog puta građani su još 2019. godine predložili kao prioritet kroz Javnu raspravu za Budžet 2020. godine i uvršten je u Operativni plan načelnika za istu godinu, ali očigledno nije realizovano?"

Odgovor: Prema Regulacionom planu usvojenom za Podlugove predviđena je saobraćajnica širine 5,5 m s obostranom pješačkom stazom širine 1,0 m.

Pomenuta saobraćajnica je projektovana kao saobraćajnica koja pripada kategoriji D puteva, u naselju, sa računskom brzinom od 40 km/h.

Atmosferska voda sa kolovoza se poprečnim i podužnim padom odvodi ka slivnicima i kontrolisano ispušta u kolektore oborinske odvodnje.

Voda s pješačkih staza se poprečnim nagibom slijeva prema unutrašnjosti-nagib prema kolovozu i dalje prema slivnicima.

Pitanje 4: "Po mojim informacijama, Vlada Kantona Sarajevo, tačnije ministar komunalne privrede, za Općinu Ilijaš izdvojio je preko 850.000,00 KM za projekte komunalne infrastrukture u našoj općini. Da li ste dio tih sredstava planirali uložiti za prvu fazu rješavanja pomenutog puta?"

Odgovor: Planirano je izvođenje radova na fekalnoj i oborinskoj kanalizaciji na dijelu puta shodno projektnoj dokumentaciji. U toku je raspisivanje tendera za pomenute radove.

ADNAN ABADŽIJA - vijećnik NIP

Pitanje 1: "Da li je u potpunosti završen projekat kanalizacione mreže u naselju Gornja

Karaula ako se jedna trećina objekata za stanovanje, naših građana, stanovništva tog naselja, nije spojila na istu"?

Odgovor: Urađena su dva glavna kolektora kojima se fekalne otpadne vode iz naselja Gornja Karaula odvođe prema kolektoru u naselju Donja Karaula, te su stvoreni uslovi za razvoj fekalne kanalizacione mreže.

Pitanje 2: "Da li će se omogućiti spajanje svih objekata u naselju Gornja Karaula na kanalizacionu mrežu kako bi projekat bio u potpunosti isplativ i koristan za sve građane pomenutog naselja a ne samo za neke od njih"?

Odgovor: Nastavak projekta isključivo zavisi od rješavanja imovinsko-pravnih odnosa na trasi i od samostalnog organizovanja građana na rješavanju tog problema. U fazi izgradnje izvršeno je spajanje objekata koji su neposredno uz trasu, kao i grupe objekata čiji vlasnici su sami finansirali izgradnju sekundarnih vodova.

Pitanje 3: "Ko je odgovoran i nadležan za prokres lokalnih puteva koji prolaze kroz šume na području cijele općine Ilijaš i kada se može početi sa tim aktivnostima u ovoj i svakoj narednoj godini na svim lokalitetima naše općine".

Odgovor: Shodno Zakonu o uređenju saobraćaja na području Kantona Sarajevo ("Službene novine Kantona Sarajevo", broj: 30/17 i 46/17) propisano je da: "Pravno lice nadležno za održavanje zelenila u cestovnom pojasu javne ceste u Kantonu dužno je brinuti da krošnje stabla i drugo rastinje ne zaklanjaju rasvjetna tijela javne rasvjete, saobraćajne znakove i svjetlosnu saobraćajnu signalizaciju, da ne ometaju preglednost na raskrsnicama te da ne ulaze u slobodne profile kolovoza, pješačkih hodnika, biciklističkih staza i tramvajske pruge odnosno, da ne smetaju mrežnim uređajima tramvajskog i trolejbuskog gornjeg voda.

Fizičko ili pravno lice koje je vlasnik zelenila i rastinja unutar svoje parcele, a koje ometa odvijanje saobraćaja na javnoj cesti, ulazi u cestovni pojas, smanjuje preglednost i zaklanja saobraćajnu signalizaciju, dužno je istu održavati na način da ne ugrožava sigurnost saobraćaja".

Općina Ilijaš je izdala nalog izvođaču "Niskogradnja Durmić" d.o.o. da izvrši raskresavanje puta preko Karašnice i puta za Donju Karaulu.

Inicijativa: "Pokrećem inicijativu za uređenje i nasipanje lokalnog puta Brijest-Krtine, Gornja Karaula koji je u veoma lošem stanju za saobraćanje za lokalno stanovništvo. Obrazloženje: Gore navedena, makadamska saobraćajnica je u veoma lošem stanju kako zbog oborinskih voda, tako i zbog lošeg materijala koji se ugradio na istu. Odvodni kanali su zapušteni i neupotrebljivi jer su zasuti materijalom sa puta i lošim održavanjem".

Odgovor: Dat je nalog izvođaču "Niskogradnja Durmić" d.o.o. da izvrši sanaciju puta Karaula-Krtine i isti su završeni.

KENAN HASIĆ - vijećnik SDA

Inicijativa: "Pokrećem inicijativu o pokretanju I faze radova u MZ Ilijaš Grad kod zgrade A1. Kada je planiran početak radova na uređenju date ulice u centru Ilijaša? Obrazloženje: Planom rada za 2021. godinu planirani su radovi na uređenju ulice kod zgrade A1 u MZ Ilijaš Grad. Kada građani mogu očekivati početak radova"?

Odgovor: Planom nabavki za 2021. godinu planirani su i radovi na redizajnu i popločavanju dijela ulice 126. Ilijaške brigade kod zgrade A1 u MZ Ilijaš Grad. Za potrebe izvođenja radova u toj ulici općina Ilijaš je uradila Glavni projekat. Trenutno se priprema tenderska dokumentacija za objavu Javnog poziva za izvođenje radova u navedenoj ulici. Po okončanju procedure oko odabira izvođača radova odmah će se pristupiti izvođenju radova na uređenju date ulice.

Inicijativa/pitanje: "Pokrećem inicijativu i pitanje vezano za prokres lokalnog puta na Karašnici. Ko je odgovoran za održavanje i prokres puta? Obrazloženje: Lokalni put na Karašnici je u datom momentu zarastao i nije siguran za saobraćaj vozila i kretanje pješaka. Dakle, da se prokres puta od pravoslavne crkve, pa sve do Šipadovih zgrada uradi u što kraćem roku".

Odgovor: Shodno Zakonu o uređenju saobraćaja na području Kantona Sarajevo

("Službene novine Kantona Sarajevo", broj: 30/17 i 46/17) propisano je da: "Pravno lice nadležno za održavanje zelenila u cestovnom pojasu javne ceste u Kantonu dužno je brinuti da krošnje stabla i drugo rastinje ne zaklanjaju rasvjetna tijela javne rasvjete, saobraćajne znakove i svjetlosnu saobraćajnu signalizaciju, da ne ometaju preglednost na raskrsnicama te da ne ulaze u slobodne profile kolovoza, pješačkih hodnika, biciklističkih staza i tramvajske pruge odnosno, da ne smetaju mrežnim uređajima tramvajskog i trolejbuskog gornjeg voda.

Fizičko ili pravno lice koje je vlasnik zelenila i rastinja unutar svoje parcele, a koje ometa odvijanje saobraćaja na javnoj cesti, ulazi u cestovni pojas, smanjuje preglednost i zaklanja saobraćajnu signalizaciju, dužno je istu održavati na način da ne ugrožava sigurnost saobraćaja".

Općina Ilijaš je izdala nalog izvođaču "Niskogradnja Durmić" d.o.o. da izvrši raskresavanje puta preko Karašnice radovi su završeni.

Inicijativa: "Pokrećem inicijativu za popravku oštećenog saobraćajnog ogledala u Novom Naselju u MZ Ilijaš Grad. Obrazloženje: Saobraćajno ogledalo je oštećeno, te je potrebna manja intervencija kako bi se ogledalo vratilo u prvobitno stanje".

Odgovor: Izvršen je terenski obilazak puta u Novom Naselju i nije uočeno oštećenje ogledala.

Inicijativa: "Pokrećem inicijativu za sanaciju tj. popravku neon sijalica i to na lokacijama:

- prolaz kod dječijeg parka u centru Ilijaša (šetalište)
- podvožnjaci u Kadarićima (prolazi ispod autoputa)".

Odgovor: Dat je nalog KJKP "PARK" d.o.o. Sarajevo koja je ugovorena firma na održavanju javne rasvjete na Kantonu Sarajevo i koja radi na rješavanju kvara na pomenutoj lokaciji.

SELMA BARIĆ - vijećnica SDP

Inicijativa: "Pokrećem inicijativu za postavljanje ogledala na sporednom putu u Podlugovima i to na dionici puta kod prodavnice građevinskog materijala Sadex, tj. na raskrsnici. Obrazloženje: Građani mjesta Podlugovi a i ostali koji prolaze tom dionicom smatraju kako bi im postavljanje ogledala na toj dionici olakšalo saobraćaj tim putem, te ne bi dovodilo do nekih neželjenih situacija. Na toj dionici nema nikakvih saobraćajnih znakova-sporedni je put pa je i razumljivo, međutim, vozači iz pravca Podlugova i Vratuše ne znaju ko ima prednost, a nit vide jedni druge (zbog velikog zida koji je između ta dva puta), pa bi im postavljanje ogledala itekako olakšalo saobraćajna toj dionici. U prilogu Vam šaljem sliku, tj. satelitski pregled tog dijela Podlugova na kojem se vidi raskrsnica".

Odgovor: Dat je nalog izvođaču "Niskogradnja Durmić" d.o.o. da izvrši postavljanje saobraćajnog ogledala na pomenutoj raskrsnici.

SEID BEKTIĆ - vijećnik SDA

Inicijativa 1: "Pokrećem inicijativu za hitnom sanacijom, odnosno asfaltiranjem puta u naselju Donja Karaula u dužini od 300 m. Naime, završenom kanalizacionom mrežom stekli su se uslovi za asfaltiranje navedene lokalne saobraćajnice, a radi se o dva puta dužine od po 150 m".

Odgovor: Služba će postupiti po usvojenom Operativnom planu za 2021 godinu.

Inicijativa 2: "Pokrećem inicijativu prema nadležnoj službi Općine Ilijaš, te općinskom načelniku za čišćenje dvije deponije, čišćenje kanala, te raskresivanje šiblja i granja dionice puta Donja Karaula-Malešićki most. Uzimajući u obzir da spomenuta dionica puta ukupne dužine 2500 m prolazi kroz dvije općine i to Ilijaš i Vogošću, te imajući u vidu da je Općina Vogošća nedavno izvršila gore pomenute aktivnosti zajedno sa grupom građana naselja Donja Karaula, izvršio sam obilazak trase, te sam se uvjerio u katastrofalno stanje dionice puta koja pripada Općini Ilijaš. Napominjem da se radi o dužini puta od oko 1200 m, te da se isti često koristi kao alternativna saobraćajnica regionalnom putu R 445, dionica Malešićki most-Donja Vogošća. Isto tako smatram da bi se ovaj problem mogao riješiti uz minimalna sredstva i trud nadležnih službi".

Odgovor: Dat je nalog izvođaču "Niskogradnja Durmić" d.o.o. da izvrši čišćenje deponija i raskresavanje na puta Malešićki most-Donja Karaula.

Inicijativa 3: "Pokrećem inicijativu za asfaltiranje puta u dužini od 200 m u naselju Ribarići. Dobio sam pritužbe građana pomenutog naselja da voda i kiše odnesu tampon koji se sa vremena na vrijeme nasipa i da je vrijeme da se pristupi trajnom rješenju tj. asfaltiranju. Ovaj put koristi preko 40 porodica tog naselja, a i u pomenutom naselju se nalaze i privredni subjekti kojima bi olakšali rad".

Odgovor: Izvršen je terenski obilazak sa predsjednikom Savjeta M.Z. Luka, urađen predmjer i očekuje se realizacija.

ALEN ARNAUTOVIĆ - vijećnik SDA

Inicijativa 1: "Podnosim inicijativu za rekonstrukciju pješačke staze koja se nalazi između autobuske stanice "Centrotrans-Eurolines" i ulice Bosanski put, odnosno magistralnog puta R 445. Obrazloženje: Navedena pješačka staza se nalazi neposredno pored magistralnog puta R445, oronulog je izgleda, koristi je veliki broj naših građana, te rekonstrukcija iste ne iziskuje značajna materijalna sredstva".

Odgovor: Služba će postupiti po usvojenom Operativnom planu za 2021 godinu.

Inicijativa 2: "Podnosim inicijativu za rekonstrukciju pješačke staze koja se nalazi između ulice Kakanjska i ulice Hašima Spahića, u neposrednoj blizini dječijeg igrališta. Obrazloženje: Pomenuta pješačka staza je neadekvatna, nefunkcionalna i nepromijenjenog izgleda proteklih 20 godina. Budući da se pomenuta pješačka staza nalazi u užem jezgru grada, te da je koristi veliki broj naših građana kojima je otežano kretanje istom".

Odgovor: Služba će postupiti po usvojenom Operativnom planu za 2021 godinu.

ANEL BUMBULOVIĆ - vijećnik SDA

Inicijativa 1: "Pokrećem inicijativu da se izvrši saniranje udarnih rupa na lokalnom putu u naselju Makljen koji prolazi kroz Pilanu XYLON. Obrazloženje: Gore navedeni dio puta koji prelazi preko željezničkog kolosjeka koji vodi u INU-u postao je glavni pristupačni put za navedeno naselje. Pomenuta dionica puta je oštećena, sa većim brojem udarnih rupa i otežanom vidljivošću".

Odgovor: Dat je nalog izvođaču "Niskogradnja Durmić" d.o.o. da izvrši sanaciju udarnih oštećenja na putu pored firme "XYLON" u Podlugovima.

Inicijativa 2: "Pokrećem inicijativu prema nadležnim općinskim službama da se izvrši čišćenje i košenje trave na prostoru oko lokalnog puta u ul. Žrtava genocida u Srebrenici i dijelu zemljišta koje je u vlasništvu JP Željeznice FBiH. Obrazloženje: Gore navedeno područje se nalazi u katastrofalnom stanju, sa dosta visokom travom i niskim rastinjem koje predstavlja potencijalnu opasnost za mještane te ulice i prolaznike. Ovih dana smo svjedoci pojave većeg broja zmija i drugih gmizavaca koji potencijalno mogu predstavljati opasnost po građane".

Odgovor: Inicijativa je dostavljena JP "Željeznice FBiH" i u saradnji sa istim općina Ilijaš će realizovati ovu inicijativu. Dio uređenja će preuzeti i Civilna zaštita Općine.

KENAN BUZA - vijećnik NIP

Pitanje 2: "Da li postoji mogućnost i način da se na parkinzima u Općini Ilijaš, prvenstveno u MZ Ilijaš Grad obezbijede određena parking mjesta za stanare stambenih jedinica ispred kojih se nalaze parkinzi. Po uzoru na druge općine koje su uradile sličnu stvar na način da stanari kupe - zakupe parking mjesto, cijenim da bi isti ili sličan model uveliko olakšao stanarima ovaj problem zbog kojeg se svakodnevno susreću sa kažnjavanjem od strane policijskih službenika, iako ni njima samim nije drago što svoj automobil moraju ostaviti na cesti ili trotoaru, a ne na obezbjeđenom parking mjestu".

Odgovor: Jedan od ključnih problema u urbanom dijelu grada postaje parkiranje, obzirom na činjenicu da je broj osobnih vozila konstantno u porastu. Upravo zbog toga Općina Ilijaš se opredijelila za investiciju izgradnje podzemne garaže na Banovcu i izgradnju parkinga preko puta Trga "Alije Izetbegovića". Smatramo da će se realizacijom ova dva projekta znatno riješiti problem nedostatka parkinga u urbanom dijelu grada.

Kada je u pitanju uspostavljanje naplate i zakupa parking mjesta oko stambenih zgrada to pitanje je neophodno regulisati posebnom Odlukom. Naime, Vlada Kantona Sarajevo je

donijela Uredbu o organizaciji i načinu naplate parkiranja u kojoj je zadužila općine da donesu poseban propis o uređenju, korištenju i naplati parkiranja kod objekata kolektivnog stanovanja i poslovnih prostora. Međutim navedena Uredba je u koliziji sa odredbama člana 7. stav 1. tačka h. Zakona o komunalnim djelatnostima KS s obzirom na to da je propisana isključiva nadležnost Kantona Sarajevo za organizaciju i način naplate parkiranja na području Kantona. Nacrtom Zakona o lokalnoj samoupravi, organizacija i način naplate parkiranja u Kantonu Sarajevo prelazi u nadležnost lokalnih zajednica.

Ukoliko dođe do usvajanja ovog Zakona i usklađivanja sa Zakonom o komunalnim djelatnostima Općina Ilijaš tad može preuzeti nadležnosti i odgovornost za održavanje, organizaciju i naplatu javnih parking prostora na području Općine Ilijaš.

NAPOMENA:

-Prilog akt broj:02/14-1-19-854/21.,koji je dostavljen iz Policijske stanice Ilijaš.

Služba za saobraćaj,
stambeno-komunalne poslove i građenje

**BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
MINISTARSTVO UNUTRAŠNJIH POSLOVA
UPRAVA POLICIJE
SEDMA POLICIJSKA UPRAVA
Policajska stanica Ilijaš**

Bosna i Hercegovina
Federacija Bosne i Hercegovine
KANTON SARAJEVO
OPĆINA ILIJAŠ

Prilijenat			
Org. jedinica		Broj	Broj priloga

Broj: 02/14-1-10-854/21
Datum: 06.08.2021. godine

OPĆINA ILIJAŠ
Služba za saobraćaj, stambeno-komunalne poslove i građenje

PREDMET: Vijećnička inicijativa, Informacija, dostavlja se;

VEZA: Akt službe za saobraćaj, stambeno-komunalne poslove i građenje, broj 03/1-19-sl/21 od 23.07.2021. godine.

U prilogu akta, dostavljamo Vam Informaciju Sedme policijske uprave, Policijske stanice Ilijaš na upućenu inicijativu od strane vijećnika SDA Hasković Alena na sedmoj sjednici općinskog vijeća održanoj dana 24.06.2021. godine.

Prilog:
- Informacija x 1,



NACELNIK PU
Samir Efendić
Samostalni inspektor
Samir Efendić

INFORMACIJA

Sačinjena u službenim prostorijama Sedme Policijske uprave, Policijske stanice Ilijaš u vezi upućene inicijative na sedmoj sjednici općinskog vijeća Ilijaš održanoj dana 24.06.2021. godine od strane vijećnika SDA Hasković Alena.

Dana 27.07.2021. godine Sedma policijska uprava, Policijske stanice Ilijaš zaprimila je akt Službe za saobraćaj, stambeno-komunalne poslove i građenje, općine Ilijaš, broj 03/1-19-sl/2021 od 23.07.2021. godine a koji se odnosi na upućenu Inicijativu vijećnika SDA Hasković Alena, Sedmoj policijskoj upravi, Policijskoj stanici Ilijaš i to: Iniciram prijedlog Sedmoj policijskoj upravi, Policijskoj stanici Ilijaš da u okviru utvrđenih nadležnosti poduzme aktivnosti sprečavanja vožnje biciklima u predjelu pješačke zone tzv. „šetalište” u Ilijašu.

Policijski službenici Sedme policijske uprave Policijske stanice Ilijaš, svakodnevno vrše obilazak ulice 126 Ilijaške brigade i to dijela „pjašačke zone” gdje je u posljednje vrijeme evidentirana navedena problematika vožnje biciklima, gdje postoji opasnost da bi moglo doći do povreda pješaka posebno male djece.

Policijski službenici Sedme policijske uprave, Policijske stanice Ilijaš su prilikom obilaska ulice 126 Ilijaške brigade „pješačke zone”, ustanovili da ista nije adekvatno obilježena saobraćajnom signalizacijom, o čemu je pismenim putem obavještena nadležna služba općine Ilijaš, dana 08.05.2018. godine, kako bi se izvršilo postavljenje saobraćajnih znakova na osnovu kojih bi policijski službenici imali pravnog osnova za sankcionisanjem nesavjesnih vozača-biciklista u pješačkoj zoni, odnosno, kako bi se sigurnost pješaka dovela na zavidan nivo.

Također vas obavještavamo da će policijski službenici Sedme policijske uprave, Policijske stanice Ilijaš, svakodnevno nastaviti sa obilaskom navedene pješačke zone te upozoravati nesavjesne vozače-bicikliste, a po postavljanju saobraćajne signalizacije policijski službnici će protiv istih poduzeti zakonske mjere i radnje.

Ilijaš: 06.08.2021. godine